




ԽԱՂԱՂՈՒԹՅԱՆ ՔՐԻՍՏՈՆԵԱԿԱՆ ԿՈՆՖԵՐԱՆՍԻ ԱՇԽԱՏԱՆՔԱՅԻՆ ԿՈՄԻՏԵԻ ՆԱՏԱՇՐՋԱՆՆ ԱՄՆ-ՈՒՄ

Սույն թվականի ապրիլի 5—8-ը Նյու-Վինդսորի (ԱՄՆ, Մերիլենդ) Եղբայրության եկեղեցու կենտրոնում կայացավ Խաղաղության քրիստոնեական կոնֆերանսի Աշխատանքային կոմիտեի նստաշրջանը՝ Արևելյան Եվրոպայի հետ հարաբերության ամերիկյան քրիստոնեական ընկերակցության հրավերով: Նստաշրջանի գլխավոր թեման էր՝ «Քրիստոնյաների բարոյական պարտավորությունները զինաթափման գործում»:

Նստաշրջանը բացվեց Խաղաղության քրիստոնեական կոնֆերանսի նախագահ, Լենինգրադի և Նովոդորոժի միտրոպոլիտ տ. Նիկողիմ արքեպիսկոպոսի ներածական խոսքով: Ներկա էին տարբեր մայրցամաքների 18 երկրների՝ Սովետական Միության, Բուլղարիայի, Ռումինիայի, Չեխոսլովակիայի, Հունգարիայի, Լեհաստանի, Դանիայի, Ֆինլանդիայի, Ֆերմերայի, Հոլանդիայի, Եվեյցարիայի, Ֆինլանդիայի, Ամերիկայի Միացյալ Նահանգների, Կանադայի, Չիլիի, Հնդկաստանի, Ծրի Լանկայի, Եթովպիայի, Սիեռա Լեոնեի եկեղեցիների 77 ներկայացուցիչներ, հյուրեր և լրագրողներ: Մայր Աթոռի կողմից նստաշրջանին մասնակցում էր Գերագույն հոգևոր խորհրդի անդամ Հովհ.

Թովուզյանը՝ որպես վերոհիշյալ կազմակերպության Միջազգային քարտուղարության անդամ:

Օրակարգը բաղկացած էր ավելի քան 120 հարցերից: Այդ հարցերի թվում էին Սովետական Միության, ԱՄՆ-ի և Հնդկաստանի պետական ներկայացուցիչների զեկուցումները՝ գլխավոր թեմայի շուրջ, ընդհանուր քարտուղարի տեղեկագիրը՝ Խաղաղության քրիստոնեական կոնֆերանսի վեցամսյա գործունեության մասին, հանձնաժողովների, ենթահանձնաժողովների, շրջանային կոմիտեների հաշվետվությունները, Խաղաղության քրիստոնեական կոնֆերանսի հետագա ձեռնարկումների ծրագիրը, բյուջեն և այլն:

Հարցերը քննարկվեցին հանգամանորեն ու ամենայն լրջությամբ և ընդունվեցին համապատասխան որոշումներ ու հանձնարարականներ: Վերջում միաձայնությամբ հավանություն տրվեց նստաշրջանի արդյունքներն ամփոփող գլխավոր փաստաթղթին՝ բանաձևին:

Խաղաղության քրիստոնեական կոնֆերանսի ընդհանուր քարտուղար դոկտ. Կարոլի Տոթի տեղեկագրից պարզվեց, որ զգալի հաջողություններ են ձեռք բերվել եկեղեցիների գլխավորած խաղաղության

շարժման ծավալման գործում: Արդեն ստեղծվել է Ասիայի խաղաղության քրիստոնեական կոնֆերանս (ԱԽՔԿ), և ծրագրված է համանման կոնֆերանս ստեղծել նաև Աֆրիկայում: Բացի այդ, աշխատանքներ են կատարվել Արևմտյան Եվրոպայի մի շարք երկրների՝ Ֆրանսիայի, Իտալիայի, Անգլիայի տարբեր եկեղեցիներ ու կրոնական ընկերակցություններ Խաղաղության քրիստոնեական կոնֆերանսի կազմում ներգրավելու ուղղությամբ:

Նստաշրջանում մեծ հետաքրքրություն առաջացրին գլխավոր թեմայի շուրջ կատարված զեկուցումները: Ամերիկայի Միացյալ Նահանգներում սովետական դեսպանատան առաջին քարտուղար Ալեքսանդր Կոկորևը հանգամանորեն շարադրեց սովետական կառավարության խաղաղասիրական քաղաքականությունը և այն դժվարությունները, որ ներկայումս խոչընդոտում են զինաթափման սովետա-ամերիկյան բանակցությունները: Զեկուցողը, փաստեր բերելով միջուկային զենքի նոր տեսակների ահարկու հզորության մասին, եզրակացրեց, որ սպառազինությունների դեմ պայքարի էլքից է կախված համայն մարդկության ապագան:

ԱՄՆ-ի պետական դեսպարտամենտի նախկին բարձրաստիճան ծառայող դոկտ. Ֆիլիպ Ֆաուլեյը ներկայացրեց ամերիկյան կառավարության քաղաքականությունը զինաթափման հարցում: Նա հայտարարեց, որ ամերիկյան կառավարությունը կողմ է լրիվ և ընդհանուր զինաթափման, սակայն տեխնիկական գիտությունների արագ զարգացումը դժվարացնում, գրեթե անհնարին է դարձնում վերահսկողությունը միջուկային զենքի նոր տեսակների արտադրության վրա՝ խանգարելով զինաթափման սովետա-

ամերիկյան բանակցությունների հաջողությանը:

Հնդկաստանի պետական խորհրդական դոկտ. Կ. Տ. Չանդին զինաթափման հարցին անդրադարձավ տնտեսական տեսանկյունից և հետաքրքրական հաշվումներով ցույց տվեց, որ ներկայումս տարբեր պետությունների կողմից սպառազինման համար ծախսվող միջոցները եթե օգտագործվեն խաղաղասիրական նպատակներով, կարող են վերջ դնել Ասիայի, Աֆրիկայի և Լատինական Ամերիկայի ժողովուրդների հետամնացությանը՝ հսկայական մղում տալով նրանց սոցիալական ու տնտեսական զարգացմանը:

Մտքերի աշխույժ փոխանակությունից հետո ընդունվեց ԱՄՆ-ի կառավարությանն ուղղված մի դիմում՝ զինաթափման հարցի վերաբերյալ, և հատուկ պատգամավորության միջոցով հանձնվեց Կոնգրեսի նախագահությանը:

Աշխատանքային կոմիտեի ապրիլի 6-ի երեկոյան նիստում ընդհանուր քարտուղար դոկտ. Կարոլի Տոթը, նստաշրջանի նախագահության անունից, ներկաներին ծանոթացրեց տարբեր եկեղեցիների պետերից ստացված ուղերձներն ու նամակները զինաթափման հարցի վերաբերյալ: Անդրադառնալով Ամենայն Հայոց կաթողիկոս Վազգեն Ա Վեհափառ Հայրապետի ուղերձին, նա դրվատեց հայ եկեղեցու խաղաղասիրական ավանդույթները և նշեց, որ նրա Պետր քարոյապետ միշտ զորավիգ է հանդիսացել և հանդիսանում Խաղաղության քրիստոնեական կոնֆերանսին:

Հայոց Հայրապետի ուղերձը ողջունվեց ծափերով և ընդունվեց շնորհակալության բանաձև:

Ստորև ներկայացնում ենք Վեհափառ Հայրապետի ուղերձը.

ՆՈՐԻՆ ՍՐԵՈՒԹՅՈՒՆ Տ. Տ. ՎԱԶԳԵՆ Ա ԱՄԵՆԱՅՆ ՀԱՅՈՑ
ԿԱԹՈՂԻԿՈՍԻ ՈՒՂԵՐԶԸ՝ ՈՒՂՂՎԱԾ ԽԱՂԱՂՈՒԹՅԱՆ
ՔՐԻՍՏՈՆԵԱԿԱՆ ԿՈՆՖԵՐԱՆՍԻ ԱՇԽԱՏԱՆՔԱՅԻՆ ԿՈՄԻՏԵԻ
ՆՍՏԱՇՐՋԱՆԻՆ

(Նյու-Վիդդսոք, Մերիլենդ-ԱՄՆ, 5—8 ապրիլի 1976)

Սիրեցյալ եղբայրներ Մեր ի Քրիստոս, Խորին գոհունակությամբ ողջունում ենք գումարումը Խաղաղության քրիստոնեական համախմբումի կոմիտեի, որի այս նստաշրջանը առաջադրել է քննարկելու՝ «Քրիստոնյաների բարոյական պարտավորությունները զինաթափման հարցում» նյութը:

Հայաստանյայց առաքելական եկեղեցին,

որի զավակները անցյալ դարերի ընթացքում ողբերգական ծանր դժբախտություններ են կրել պատերազմների ընթացքում, միշտ աղոթել է և իր ձայնը բարձրացրել ի պաշտպանություն խաղաղության սրբազան դատի և համբապնդում բարի կամեցողության, աշխարհի ժողովուրդների միջև:

Ազգությունների միջև խաղաղության

պաշտպանության և ամրապնդման ճանապարհի վրա, զինաթափությունը անշուշտ որ կհանդիսանա մեր ժամանակների ամենաառաջնահերթ հարցը, որը անհրաժեշտ է լուծել շուտափույթ կերպով: Աշխարհի բոլոր ժողովուրդները կենսականորեն շահագրգռված են այդ հարցի դրական լուծումով, որովհետև միջուկային մի պատերազմ համայն մարդկության համար կլիներ ամենամեծ աղետը:

Ահա թե ինչու զինաթափման հարցը, շատ բարդությունների հետ կապված, կարող է ամբողջական լուծում գտնել միմիայն խաղաղատենչ բոլոր պետությունների, բոլոր եկեղեցիների, բարի կամեցողության տեր բոլոր մարդկանց հավաքական ճիգերով, սիրով և ազնիվ հույսերով միավորված: Նպատակ զինաթափման գործին՝ նշանակում է պատվար բարձրացնել հնարավոր ամեն պատերազմի ճանապարհի վրա: Մարդկության երջանկությունը կարելի է իրականացնել միայն մի աշխարհում, որտեղ բացառվում են պատերազմները և որտեղ միջուկային ուժը և պատերազմական զենքերի ծախսերը օգտագործվելու են մեր նմանների տառապանքների վերացման համար:

Հարյուր միլիոնավոր մարդիկ, ցածր զարգացման մակարդակի վրա գտնվող երկրներում, Աֆրիկայում, Ասիայում և Լատինական Ամերիկայում, մեր օրերին որոնում են ամենաազդու մեթոդները գտնելու

համար իրենց հառաջադիմության և բարեկեցության ճանապարհը:

Մենք երջանիկ ենք հաստատելու, թե արդի միջազգային իրադրությունը, որը բնորոշվում է խաղաղ գոյակցության սկզբունքներով, նոր և մեծ նպաստ կարող է հանդիսանալ զինաթափման: Իրականություն է այսօր, թե սովետ-ամերիկյան բարեկամության արդի հարաբերությանց մեջ, զինաթափման սահմանափակման հարցերը գրավում են կարևորագույն տեղ:

Մեզ համար մեծագույն մխիթարություն է հաստատել, թե ժողովուրդների ուշադրությունը այս օրերին կենտրոնացած է ՄԱԿ-ի զինաթափման համաշխարհային համագումարի աշխատանքների վրա:

Հանուն մեր Տիրոջ Հիսուսի Քրիստոսի Ավետարանի, մենք քրիստոնյաներս, հաստատականորեն ակնկալում ենք իրականացումը ընդհանուր և ամբողջական զինաթափման և պատերազմական ծախսերի օգտագործումը խաղաղ նպատակների համար:

Սիրելի եղբայրներ, Մենք վերստին ջերմորեն ողջունում ենք ձեզ և աղոթում, որ սուրբ Հոգին լինի ձեզ օգնական, որպեսզի նաև ձեր աղոթքներով և անդուլ ճիգերով, արմատախիլ լինի պատերազմը մարդկային ընկերության կյանքի անդաստանից:

Թող Աստված օրհնի ձեր աշխատանքները և ձեր սուրբ առաքելությունը:

